

2050 v
LETTRE

DE REPLIQUE

DE LA

PETITE NICHON

DV MARAIS,

A MONSIEVR

LE PRINCE DE CONDE',

A S. GERMAIN.

M. DC. XLIX.

LETTRE

DE REPLIQUE

DE LA

PETITE NICHON

DU MARAIS

A MONSIEUR

LE PRINCE DE CONDE

A S. GERMAIN

M. DC. XLIX

3

LETTRE
DE REPLIQUE
DE LA
PETITE NICHON
DV MARAIS,

A MONSIEVR LE PRINCE
de Condé, à Saint Germain.



MONSIEVR,

La responce que vous m'avez faite, remplie
de mespris & de menaces, m'engage à vous
repartir avec autant de respect que i'en dois à

A ij

vne personne de vostre vertu & de vostre meri-
 te. Ainsi, Monsieur, ne dois-je pas vous dire
 en toute humilité, que si vous m'estimez mes-
 prisable, à cause de la profession que ie fay de
 favoriser ceux qui sont de vostre complexion
 passionnée; vous ne devez point trouuer
 estrange par la mesme raison, que ie ne vous
 considere pas avec des meilleurs sentimens:
 puisque vostre vie me sert d'exemple, & que
 cet exemple est ma plus forte defense. Vous
 imaginez vous, Monsieur, que vos inclina-
 tions soient plus loüables que les miennes? non
 certainement, & l'auantage me demeurera
 dans la comparaison: car ie fay plaisir tres vo-
 lontiers à ceux qui m'en conuient. Vous au
 contraire prenez plaisir de nuire, & desobli-
 ger ceux qui ne vous y ont point obligé. J'aime
 la multiplication & le peuplement de ma pa-
 trie. Quant à vous, vostre plus grande ioye est
 la destruction des hommes, & de les voir perir
 miserablement. Il est vray, & ie le confesse,
 (comme vous me le mandez) ie suis vne Sui-
 uante de Cupidon. Persuadez-vous encores
 que ie sois vne Signora vniuerselle. mais n'e-
 stes vous pas aussi vn Protecteur general des
 Hostels agreables d'Amour, puisque toutes
 les

les Dames de la qualité de la Durier, qui ont des Maisons de recreation en plusieurs villages circonuoisins de cette ville, n'ont point esté comprises en vostre Roolle de contribution, & qu'elles seront exemptes du pillage & du feu. Ma foy, Monsieur, vous ne faites pas plus d'estime d'honneur que moy : Et si ie me laisse gagner par de l'argent, vous en faites de mesme : Pardon, la passion m'emporte. Mais considerez en mon excuse, qu'au lieu d'une recompense de vous auoir niché, vous vous efforcez de faire niche à Nichon, en luy faisant de tels reproches. Ce n'est pas qu'ils me touchent. Ne croyez pas que vos discours m'épouuantent; i'en ay bien veu d'autres que vous qui ne m'ont pas fait peur; tant s'en faut, souuenez-vous que ie vous ay fait trembler, & plusieurs de vostre sorte. Neantmoins, comme si vous en auiez perdu la memoire, vous me menacez par vn excez de fanfaronnade. Je dis par vn excez de fanfaronnade, car il n'y a point d'apparence que vous executiez vos desseins. Quoy? vous attaquerez le Faux bourg Saint Germain? ce projet auortera, vous demeurerez aux Incubables : & si vostre valeur vous emporte plus outre, on vous arrestera aux Petites Maisons.

Si vous attaquez aussi les Fauxbourgs S. Michel & S. Iacques, les Chartreux & les Capucins vous receuront, & vous feront ouvrir la porte du Conuent Feuillantins ; là vous apprendrez comme l'on donne la discipline, & comme il faut ieusner, afin que vous faciez penitence d'auoir esté mutin. De dire que vous ne vous y arresterez pas, & que vous passerez plus auant, l'affection qu'ils portent à vostre salut, fera qu'ils ne le permettront point. Si vous faites donner par le Fauxbourg S. Marceau, vous y trouuerez des valets de chambre, qui chaufferont des bas façon du quartier, à vos soldats deschauffez, pour aider plus commodement à leur retour. Si vous faites assaillir le Fauxbourg S. Victor, vous n'y trouuerez de personnes fauorables, que les garçons pensionnaires de l'Abbaye, qui vous prieront d'estre de leur nombre. Si vous faites donner par le Fauxbourg S. Antoine, vous demeurerez à la Bastille. Si au Marais du Temple, il est à craindre que vous ne vous embourbiez trop auant. Si par le Fauxbourg S. Martin, l'on vous contraindra de faire retraite dans S. Lazare, où le Pere Vincent fera ses efforts de vous conuertir, & de vous enseigner la maniere de faire des

aspirations. Vous proposant de venir au Fauxbourg de Montmartre, les Martyrs vous arrêteront, & l'on vous canonisera. Si vous pretendez forcer le Fauxbourg S. Honoré, & la porte de la Conference, vous n'y acquerrez point d'honneur, car l'on vous fera faire vn tour de Cours à la Guiche. Apres toutes ces fauorables receptions, tiendrez-vous encores, comme vous faites, les habitans de Paris pour des badaux? Mais sçavez-vous qu'ils ont esté ainsi appelez par predestination, & que ce nom iusques à present plein d'ironie, retournera à leur honneur aux despens de vostre gloire. Pour vous expliquer le sens caché sous ce mot, selon la Prophetie, apprenez, Monsieur, que vos Troupes tourneront le dos aux Parisiens, qui les battront de cette sorte: c'est la raison pourquoy seulement, ils ont esté, & seront nommez badaux. Encore vne fois, Monsieur, ie vous demande pardon de la liberté que i'ay prise de vous escrire si franchement, & aussi de ne vous donner point d'autre qualité que celle de Monsieur, au lieu de Monseigneur. C'est vne habitude que i'ay contractée lors que vous me traittiez comme vostre femme, & encore avec beaucoup plus d'affection. Mais vous en auez perdu le souuenir, & moy ie

ne perdray jamais la mémoire des maux que
vous causez à la France, qui ne m'obligent
pas à me dire

MONSIEUR,

Vostre tres humble, tres-obeissante,
& tres-affectionnée Servante

LA PETITE NICHON.

A Paris ce 26. Février

1649.